



中国经典名著

全唐诗

(三十七)

黄怀仁 齐思明 校正

学苑音像出版社

目 录

第六百八十一卷.....	1
第六百八十二卷.....	28
第六百八十三卷.....	54
第六百八十四卷.....	84
第六百八十五卷.....	109
第六百八十六卷.....	133
第六百八十七卷.....	157
第六百八十八卷.....	179
第六百八十九卷.....	188
第六百九十卷.....	197
第六百九十一卷.....	206
第六百九十二卷.....	240
第六百九十三卷.....	288
第六百九十四卷.....	303

第六百八十一卷

感事三十四韵（丁卯已后）

韩偓

紫殿承恩岁，金銮入直年。人归三岛路，日过八花砖。
鸳鸯皆回席，皋夔亦慕膺。庆霄舒羽翼，尘世有神仙。
虽遇河清圣，惭非岳降贤。皇慈容散拙，公议逼陶甄。
江总参文会，陈暄侍狎筵。腐儒亲帝座，太史认星躔。
侧弁聆神算，濡毫俟密宣。宫司持玉研，书省擘香笺。
唯理心无党，怜才膝屡前。焦劳皆实录，宵旰岂虚传。
始议新尧历，将期整舜弦。去梯言必尽，仄席意弥坚。
上相思怨恶，中人詎省愆。鹿穷唯抵触，兔急且 獯。
本是谋谗死，因之致劫迁。氛霾言下合，日月暗中悬。
恭显诚甘罪，韦平亦恃权。畏闻巢幕险，宁寤积薪然。
谅直寻钳口，奸纤益比肩。晋逸终不解，鲁瘠竟难痊。
只拟诛黄皓，何曾识霸先。曩絜翻丑正，养虎欲求全。
万乘烟尘里，千官剑戟边。斗魁当北坼，地轴向西偏。
袁董非徒尔，师昭岂偶然。中原成劫火，东海遂桑田。
溅血惭嵇绍，迟行笑褚渊。四夷同效顺，一命敢虚捐。



山岳还青耸，穹苍旧碧鲜。独夫长啜泣，多士已忘筌。
郁郁空狂叫，微微几病癡。丹梯倚寥廓，终去问青天。

向隅

韩偓

守道得途迟，中兼遇乱离。刚肠成绕指，玄发转垂丝。
客路少安处，病床无稳时。弟兄消息绝，独敛问隅眉。

社后

韩偓

社后重阳近，云天澹薄间。目随棋客静，心共睡僧闲。
归鸟城衔日，残虹雨在山。寂寥思晤语，何夕款柴关。

息虑

韩偓

息虑狎群鸥，行藏合自由。春寒宜酒病，夜雨入乡愁。
道向危时见，官因乱世休。外人相待浅，独说济川舟。



早起探春

韩偓

句芒一夜长精神，腊后风头已见春。烟柳半眠藏利脸，
雪梅含笑绽香唇。渐因闲暇思量酒，必怨颠狂泥摸人。
若个高情能似我，且应欹枕睡清晨。

味道

韩偓

如含瓦砾竟何功，痴黠相兼似得中。心系是非徒怅望，
事须光景旋虚空。升沉不定都如梦，毁誉无恒却要聋。
弋者甚多应扼腕，任他闲处指冥鸿。

秋郊闲望有感

韩偓

枫叶微红近有霜，碧云秋色满吴乡。鱼冲骇浪雪鳞健，
鸦闪夕阳金背光。心为感恩长惨戚，鬓缘经乱早苍浪。
可怜广武山前语，楚汉宁教作战常。



李太舍池上玩红薇醉题

韩偓

花低池小水泔泔，花落池心片片轻。酩酊不能羞白鬓，
颠狂犹自眷红英。乍为旅客颜常厚，每见同人眼暂明。
京洛园林归未得，天涯相顾一含情。

余寓汀州沙县，病中闻前郑左丞璘随外镇举荐...感悟也

韩偓

莫恨当年入用迟，通材何处不逢知。桑田变后新舟楫，
华表归来旧路岐。公干寂寥甘坐废，子牟欢抃促行期。
移都已改侯王第，惆怅沙堤别筑基。

又一绝请为申达京洛亲交知余病废

韩偓

鬓惹新霜耳旧聋，眼昏腰曲四肢风。
交亲若要知形候，岚嶂烟中折臂翁。



梦中作

韩偓

紫宸初启列鸳鸾，直向龙墀对揖班。九曜再新环北极，
万方依旧祝南山。礼容肃睦纓綬外，和气熏蒸剑履间。
扇合却循黄道退，庙堂谈笑百司闲。

建谿滩波心目惊眩余平生溺奇境今则畏怯不暇因书...
八字

韩偓

长贪山水羨渔樵，自笑扬鞭趁早朝。
今日建谿惊恐后，李将军画也须烧。

自沙县抵龙溪县值泉州军过后村落皆空因有一绝

韩偓

水自潺湲日自斜，尽无鸡犬有鸣鸦。
千村万落如寒食，不见人烟空见花。



此翁（此后在桃林场）

韩偓

高阁群公莫忌依，侂心不在宦名中。岩光一唾垂绶紫，
何胤三遗大带红。金劲任从千口铄，玉寒曾试几炉烘。
唯应鬼眼兼天眼，窥见行藏信此翁。

失鹤

韩偓

正怜标格出华亭，况是昂藏入相经。碧落顺风初得志，
故巢因雨却闻腥。几时翔集来华表，每日沈吟看画屏。
为报鸡群虚嫉妒，红尘向上有青冥。

卜隐

韩偓

屏迹还应减是非，却忧蓝玉又光辉。桑梢出舍蚕初老，
柳絮盖溪鱼正肥。世乱岂容长惬意，景清还觉易忘机。
世间华美无心问，藜藿充肠苾作衣。



晨兴

韩偓

晓景山河爽，闲居巷陌清。已能消滞念，兼得散馀醒。
汲水人初起，回灯燕暂惊。放怀殊未足，圆隙已尘生。

暴雨

韩偓

电尾烧黑云，雨脚飞银线。急点溅池心，微烟昏水面。
气凉氛祲消，暑退松篁剑。丛蓼亚赭茸，擎荷翻绿扇。
风期谁与同，逸趣余探遍。欲去更迟留，胸中久交战。

山院避暑

韩偓

行乐江郊外，追凉山寺中。静阴生晚绿，寂虑延清风。
运塞地维窄，气苏天宇空。何人识幽抱，目送冥冥鸿。



闲兴

韩偓

景寂有玄味，韵高无俗情。他山冰雪解，此水波澜生。
影重验花密，滴稀知酒清。忙人常扰扰，安得心和平。

漫作二首

韩偓

暑雨洒和气，香风吹日华。瞬龙惊汗漫，翥凤碎云霞。
悬圃珠为树，天池玉作砂。丹青能几级，何必待乘槎。
黍谷纯阳入，鸾霄瑞彩生。岳灵分正气，仙卫借神兵。
污俗迎风变，虚怀遇物倾。千钧将一羽，轻重在平衡。

腾腾

韩偓

八年流落醉腾腾，点检行藏喜不胜。
乌帽素餐兼施药，前生多恐是医僧。



寄隐者

韩偓

烟郭云扃路不遥，怀贤犹恨太迢迢。长松夜落钗千股，
小港春添水半腰。已约病身抛印绶，不嫌门巷似渔樵。
渭滨晦迹南阳卧，若比吾徒更寂寥。

闲居

韩偓

厌闻趋竞喜闲居，自种芜菁亦自锄。麋鹿跳梁忧触拨，
鹰鹯搏击恐粗疏。拙谋却为多循理，所短深惭尽信书。
刀尺不亏绳墨在，莫疑张翰恋鲈鱼。

僧影

韩偓

山色依然僧已亡，竹间疏磬隔残阳。
智灯已灭馀空烬，犹自光明照十方。



洞庭玩月

韩偓

洞庭湖上清秋月，月皎湖宽万顷霜。玉碗深沈潭底白，
金杯细碎浪头光。寒惊乌鹊离巢噪，冷射蛟螭换窟藏。
更忆瑶台逢此夜，水晶宫殿挹琼浆。

赠隐逸

韩偓

静景须教静者寻，清狂何必在山阴。蜂穿窗纸尘侵砚，
鸟斗庭花露滴琴。莫笑乱离方解印，犹胜颠蹶未抽簪。
筑金总得非名士，况是无人解筑金。

南浦

韩偓

月若半环云若吐，高楼帘卷当南浦。应是石城艇子来，
两桨咿哑过花坞。正值连宵酒未醒，不宜此际兼微雨。
直教笔底有文星，亦应难状分明苦。



桃林场客舍之前有池半亩木槿栉比阼水遮山...五言八韵

韩偓

插槿作藩篱，丛生覆小池。为能妨远目，因遣去闲枝。
邻叟偷来赏，栖禽欲下疑。虚空无障处，蒙闭有开时。
苇鹭怜潇洒，泥鳅畏日曦。稍宽春水面，尽见晚山眉。
岸稳人偷钓，阶明日上基。世间多弊事，事事要良医。

中秋寄杨学士（一作中秋永夕奉寄杨学士兄弟）

韩偓

鳞差甲子渐衰迟，依旧年年困乱离。
八月夜长乡思切，鬓边添得几茎丝。

寄禅师

韩偓

他心明与此心同，妙用忘言理暗通。气运阴阳成世界，
水浮天地寄虚空。劫灰聚散铄镞黑，日御奔驰茧栗红。
万物尽遭风鼓动，唯应禅室静无风。



清兴

韩偓

阴沈天气连翩醉，摘索花枝料峭寒。
拥鼻绕廊吟看雨，不知遗却竹皮冠。

深院

韩偓

鹅儿唼唼梳黄嘴，凤子轻盈腻粉腰。
深院下帘人昼寝，红蔷薇架碧芭蕉。

凄凄

韩偓

深将宠辱齐，往往亦凄凄。白日知丹抱，青云有旧蹊。
嗜咸凌鲁济，恶洁助泾泥。风雨今如晦，堪怜报晓鸡。

火蛾

韩偓

阳光不照临，积阴生此类。非无惜死心，奈有灭明意。
妆穿粉焰焦，翅扑兰膏沸。为尔一伤嗟，自弃非天弃。



信笔

韩偓

春风狂似虎，春浪白于鹅。柳密藏烟易，松长见日多。
石崖采芝叟，乡俗摘茶歌。道在无伊郁，天将奈尔何。

雷公

韩偓

闲人倚柱笑雷公，又向深山霹怪松。
必若有苏天下意，何如惊起武侯龙。

船头

韩偓

两岸绿芜齐似翦，掩映云山相向晚。
船头独立望长空，日艳波光逼人眼。

喜凉

韩偓

炉炭烧人百疾生，凤狂龙躁减心情。四山毒瘴乾坤浊，
一簟凉风世界清。楚调忽惊凄玉柱，汉宫应已湿金茎。



豪强顿息蛙唇吻，爽利重新鹤眼睛。稳想海槎朝犯斗，
健思胡马夜翻营。东南亦是中华分，蒸郁相凌太不平。

天鉴

韩偓

何劳谄笑学趋时，务实清修胜用机。猛虎十年摇尾立，
苍鹰一旦醒心飞。神依正道终潜卫，天鉴衷肠竟不违。
事历艰难人始重，九层成后喜从微。

江岸闲步（此后壬申年作，在南安县）

韩偓

一手携书一杖筇，出门何处觅情通。立谈禅客传心印，
坐睡渔师著背篷。青布旗夸千日酒，白头浪吼半江风。
淮阴市里人相见，尽道途穷未必穷。

野塘

韩偓

侵晓乘凉偶独来，不因鱼跃见萍开。
卷荷忽被微风触，泻下清香露一杯。



余卧疾深村闻一二郎官今称继使闽越笑余迂古... 因成
此篇

韩偓

枕流方采北山薇，驿骑交迎市道儿。雾豹只忧无石室，
泥鳅唯要有洿池。不羞莽卓黄金印，却笑羲皇白接 。

莫负美名书信史，清风扫地更无遗。

安贫

韩偓

手风慵展一行书，眼暗休寻九局图。窗里日光飞野马，
案头筠管长蒲卢。谋身拙为安蛇足，报国危曾捋虎须。
举世可能无默识，未知谁拟试齐竽。

残春旅舍

韩偓

旅舍残春宿雨晴，恍然心地忆咸京。树头蜂抱花须落，
池面鱼吹柳絮行。禅伏诗魔归净域，酒冲愁阵出奇兵。
两梁免被尘埃污，拂拭朝簪待眼明。

